



მამუკა ცუხიშვილი

ღვაწლით გაკვალული გზა

ზემო იმერეთში, საჩხერის რაიონში მდებარეობს ულამაზესი სოფელი ჭორვილა. ის გაშენებულია ჭიათურის პლატოზე. თავად პლატო იმერეთის მაღლობის ჩრდილო-დასავლეთ ნაწილშია, სადაც კრისტალური სუბსტრატი თითქმის დაუნაოჭებელი მეზოზოურ-კაიოზოური ნალექების შრეებითაა დაფარული.

ჭორვილა საჩხერიდან 6 კილომეტრში მდებარეობს. სოფელში ჩამოედინება პატარა მდინარე ფრონე, რომელიც მდინარე ყვირილას მარჯვენა შენაკადია. სოფლის ჰავა ზომიერია, ზამთარი — ცივი და თოვლუხვი. ჭორვილა მდიდარია ბუნებრივი სასმელი წყლითა და უნიკალური ტყის მასივით.

ისტორიულ წყაროებს მიეყვართ წმიდა მეფე თამარის ეპოქამდე... მანამდე კი ამ სოფელში დასახლება ჯერ კიდევ ბრინჯაოსა და რკინის ხანის პერიოდშიც ყოფილა, რისი დასტურიცაა სოფელში აღმოჩენილი ყორღანული ტიპის სასაფლაო. ჩვენამდე შემონახულია მეფე თამარის მიერ გაცემული სიგელი, რომლითაც იგი ჭორვილელებს 12 გელათელი ბერის გამოკვებას აუკლებს.

ისტორიული ძეგლებიდან აღსანიშნავია გრიგოლწმიდას სალოცავი, წერეთლების ციხის ნანგრევები, წმინდა ნინოს სახელობის ეკლესია და ახლახან აგებული (განახლებული) თორმეტი მოციქულის ეკლესია.

სოფელში აღინიშნება „გრიგოლობა“, რომელსაც აღდგომიდან ერთი კვირის შემდეგ წმინდა გრიგოლ ხანძთელის პატივსაცემად დღესასწაულობენ. ამ სოფელში მრავალი ცნობილი და ღირსეული ადამიანი დაიბადა, მაგრამ ერთი ადამიანის დაბადებამ რადიკალურად შეცვალა საჩხერისა და ჭორვილას ისტორია. ამ ადამიანის ქველმოქმედებამ, პრაქტიკულად შეცვალა საქართველოს თანამედროვე ცხოვრების პერიპეტიები... მან დროსა და ეპოქას გაუსწრო...

1956 წლის 18 თებერვალს ჭორვილაში გრიგოლ ივანიშვილისა და ცილა დვალის ოჯახში დაიბადა ბიძინა ივანიშვილი. იქვე დაასრულა საშუალო სკოლა და შემდეგ თბილისის ივანე ჯავახიშვილის სახელობის უნივერ-

სიტუტის საინჟინრო-ეკონომიკური ფაკულტეტი წარჩინებით. 1982 წელს დაიცვა საკანდიდატო დისერტაცია თემაზე „მეცნიერული ორგანიზაცია და შრომის ეკონომიკა“.

რამდენიმე წლის წინ საქართველოს მეცნიერებათა ეროვნული აკადემიის პრეზიდიუმმა, პირველად საქართველოში, ერთსულოვნად მიანიჭა ბატონ ბიძინა ივანიშვილს ეკონომიკის მეცნიერებათა საპატიო დოქტორის წოდება.

სწორედ მეცნიერებათა აკადემია იყო პირველი დამკვეთი იმ პროდუქციისა, რომელიც ბიზნესმენს შემოჰქონდა საქართველოში და ეს იყო კომპიუტერული ტექნიკა...

იმთავითვე დაინტერესდა პროკურატურა ბიზნესმენის საქმიანობით, მას ანგარიშები დაუყადაღეს და ივანიშვილიც იძულებული შეიქნა, დაეტოვებინა სამშობლო.

შეუძლებელია ამხელა ბიზნესის მართვა, თუ არ გაქვს ნიჭი და არ ხარ შრომისმოყვარე, თუ არ ხარ ობიექტური, სამართლიანი, ერთგული, კეთილი და მორწმუნე...

ბიძინა ივანიშვილში თავმოყრილია ყველა ის სიკეთე, რომელიც ღმერთმა მიმადლა ადამიანს და ისიც ცდილობს თავისი კეთილშობილებითა და უბრალოებით ადასრულოს სიტყვები: „მიეცით, და მოგეცეს თქვენ. საწყაული კეთილი და შეხრილი და დატენილი და ზედაგარდათხეული მოგეცენ წიადთა თქვენთა; მითვე საწყაულითა, რომლითა მიუწყოთ, კუალად მოგაწყოს თქვენ“ (ლუკ. 6,38).

ჰონკონგში 1990 წელს დაწყებული სუფთა ბიზნესით მან მოიპოვა დიდი აღიარება და რუსეთში განახორციელა ინვესტიციები, რამაც უდიდესი ნაყოფი გამოიღო.

„მეტალინვესტი“, „ექიმი სტოლეტოვი“, „რუსული კრედიტი“, „იმეკს-ბანკი“, „ინტერფინდ ტრეიდი“, „სტოილენსკის ნივა“, „ტიაჟმეზპრესი“, „რტი-კაუჩუკი“, „ერკაფარმა“, „რკ-გარანტი“, სასტუმროები „მინსკი“ და „ცენტრალური“... ეს ის მცირე ჩამონათვალია, რომელიც რუსეთსა და მთელს მსოფლიოში საუკეთესო ბრენდის სახელს ატარებს.

საქართველოში ბიზნესმენის დაბრუნება მოხდა საღვთო მადლით, ანუ ყველაზე დიდი ტაძრის — სამების საპატრიარქო ლავრის აშენებითა და იმ პროექტების განხორციელებით, რომელთაც სასიცოცხლო მნიშვნელობა ჰქონდათ ჩვენი ერისათვის.

2008 წელს გამოცემული ჟურნალი „ბიზნესი და კანონმდებლობა“ წერს: „რუსეთშიც და დასავლეთშიც ყველა აღიარებს, რომ ბიძინა ივანიშვილი ძლიერი ეკონომისტ-ფინანსისტია, ასევე კარგი სტრატეგი, საუცხოო ხელმძღვანელი და ორგანიზატორი; მკაცრია მართვაში და ძალზე მომთხოვნი იმათ მიმართ, ვინც მასზე დაკისრებულ მოვალეობას პირნათლად არ ასრულებს“.

აღარაგის სჭირდება იმის ახსნა, თუ როგორი შრომისმოყვარე და ბე-
ჯითია ბატონი ბიძინა.

მე მინდა რეალური და ობიექტური სურათი დაგიხატოთ და დანარჩენი
თავად განსაზღვრეთ.

1991 წელს 29 აპრილის მიწისძვრამ საჩხერე და მისი შემოგარენი სო-
ფლები თითქმის მიწასთან გაასწორა, რამდენიმე ადამიანი დაიღუპა, უი-
მელობამ და ქაოსმა დაისადგურა ირგვლივ. თუ შეიძლება ითქვას, ივანიშ-
ვილის გამოჩენამდე საჩხერე იყო კაცისაგან ანუ ხელისუფლებისაგან
მივიწყებული და უპატრონოდ „დაგდებული“... ამის მიუხედავად საჩხერეში
სიცოცხლე წამით არ შეჩერებულა...

როდესაც ბიძინა ივანიშვილი მშობლიურ ჭორვილას დაუბრუნდა და
საჩხერეში დაიწყო ინვესტიციების ჩადება, ეს იყო ისტორიული მოვლენა
და უდიდესი ბედნიერება, რადგან აკაკის სათაყვანებელი რაიონი იწყებდა
„ახალ სიცოცხლეს“...

ჯერ კიდევ ე. წ. „ვარდების რევოლუციამდე“ ქიმი-საჩხერის საავტო-
მობილო გზის ურთულესი მონაკვეთის კეთილმოწყობით საცნაური გახდა
ბატონ ბიძინას ქველმოქმედება, რიგითი ადამიანები მეტს ვერ ვხედავდით
და ჩვენს უდიდეს სიმპათიასა და მაღლიერებას ერთმანეთთან აზრთა გაცვ-
ლა-გამოცვლით გამოეხატავდით.

შემდეგ დაიწყო აღმშენებლობის ერა...

ერთი რამ უნდა ითქვას ხმამაღლა: ყველა პროექტის განხორციელება,
ძველის განახლება თუ ახლის მშენებლობა უაზრო და უსაფუძვლოა, თუ
იგი არ ემსახურება ადამიანების კეთილდღეობასა და მათ ზეგონდელ
დღეს...

სხვა მრავალთაგან ბიძინა ივანიშვილმა ორი უდიდესი საქმე გააკეთა:
ადამიანების სულის გადასარჩენად სამების საპატრიარქოს ტაძრის მშენე-
ბლობა დააფინანსა, ხოლო ჯანმრთელობის შესანარჩუნებლად მანამდე
არნახული უდიდესი სამედიცინო კლინიკა დააფუძნა...

ამ კლინიკაში მოწვეულ იქნა ქვეყნის წამყვანი მედიკოსები, რომლე-
ბიც მსოფლიოში ყველაზე მაღალტექნიკური აპარატურით (ადგილობრივი
ექიმების დახმარებით) ებრძოდნენ მრავალ ავადმყოფობასა და სენს. თუ
ადგილზე, საჩხერის საავადმყოფოში შეუძლებელი იყო დაავადების დამარ-
ცხება, პაციენტი ამავე კლინიკის ადმინისტრაციის რეკომენდაციით იგზა-
ვებოდა დედაქალაქში, შპს სადაზღვევო კომპანია „ქართუს“ საგარანტიო
წერილის საფუძველზე შესაბამისი პროფილის, ასევე წამყვანი კლინიკის,
პაციენტი ხდებოდა და მისთვის გაწერილ ხარჯებს სადაზღვევო კომპანია
სრულყოფილად ანაზღაურებდა.

აქვე უნდა აღინიშნოს ისიც, რომ ერთადერთი ყველაზე გადამხდელუ-
ნარიანი სადაზღვევო კომპანია მხოლოდ „ქართუ“ იყო, რომელიც სწორედ
ბიძინა ივანიშვილის წყალობით დაფუძნდა და რომელმაც ბოლო 10 წლის

მანძილზე მთელი რაიონი დააზღვია.

ჯერ კიდევ წინა ხელისუფლების პერიოდში (არ შემიძლია მადლობა არ ვუთხრა ბატონ ელუარდ შვეარდნაძეს ბიძინა ივანიშვილისადმი გამოჩენილი უდიდესი თანადგომისა და მხარდაჭერისთვის) ბიზნესმენმა დაიწყო და „ვარდების რევოლუციის“ შემდეგ დაასრულა ისტორიული პროექტები. განაახლა სარაიონო კულტურის სახლი, რომელიც ობოლა ციმაკურიძის სახელს ატარებს. თითქმის თავიდან ააშენა კინოს სახლი; ასევე — მოსწავლე-ახალგაზრდობის სახლი, სპორტკომპლექსი, სანეპიდსამსახურის და სახანძროს შენობები, რკინიგზის სადგური (რომელიც თავისი არქიტექტურული იერსახით ერთადერთია მთელს საქართველოში), აკაკი წერეთლის სახლ-მუზეუმი სხვიტორში; სოფლებში — ბეტონისა და ასფალტის ქარხნები, საჩხერის ბაზრის ახალი შენობა თავისი ინფრასტრუქტურით, გვარდიის ქალაქი, რომელიც ევროპაში ერთ-ერთი პირველია თავისი მაღალი სამხედრო-სამეცნიერო დონითა და ტექნოლოგიებით.

ბოლო წლებია საჩხერეში დაიწყო საცხოვრებელი სახლების ძველი და უხარისხო, ასევე ჯანმრთელობისათვის მავნე შიფერის სახურავების შეცვლა ძვირფასი მასალით დამზადებული სახურავებით, რამაც მთელი რაიონის მოსახლეობა გაახარა. საჩხერეში მოხდა სოფლების სრული გაზიფიცირება.

სოციალურად დაუცველნი, ინვალიდები, მრავალშვილიანი ოჯახები და ქვრივ-ობლები — უკვე მრავალი წელია ქველმოქმედისაგან შემწვობებს იღებენ, რაც უდავოდ აღსანიშნავია და რაც არ ხდება არსად... პედაგოგები და მედიკოსები საკმაოდ მაღალ ანაზღაურებას იღებენ, რაც პროფესიულ ერთგულებასთან ერთად მათ მიერ გაწეული სამუშაოს მაღალ ხარისხს განაპირობებს. საწარმოებსა და ორგანიზაციებში დასაქმებულია ასობით ადამიანი, რამაც მრავალი ოჯახი შიმშილსა და სიციფეს გადაარჩინა. შეღავათები კომუნალურ გადასახადებზე იმთავითვე დაწესდა, მაგრამ შეზღუდულ პირობებში მყოფი მეცენატი ვერ გაექცა იმ წნეხს, რომელშიაც ხელისუფლებამ მოაქცია და შედეგმაც არ დააყოვნა: გამოიკვეთა მეტად საშიში ტენდენცია, რაც 1937 წლების მოვლენებს უფრო ჰგავს, ვიდრე XXI საუკუნის „დემოკრატიული“ ფასეულობების მქონე ქვეყნის მოქმედებას. როგორც კი ქველმოქმედმა პოლიტიკაში მოსვლის სურვილი განაცხადა, მათ მიმართ, რომელნიც მის წრეში ტრიალებენ, ან მის მიერ დაფუძნებულ საწარმო-დაწესებულებებში მსახურობენ, ზორციელდება ფარული თუ აშკარა ზეწოლა და მუქარა, რისი ნათელი დადასტურებაცაა „ქართუ ბანკის“ ირგვლივ ატეხილი აურზაური.

ბიძინა ივანიშვილმა დროსა და ეპოქას გაუსწრო. იგი არ არის ჩვეულებრივი ადამიანი, იგი არ არის ერთი რიგითი ქართველი. მაშინ, როდესაც საჩხერეში, რომ იტყვიან „შრომის ფერხული იყო გაჩაღებული“, ბიძინა ივანიშვილი ხან ვერტმფრენითა და ხანაც ფეხით დადიოდა და ათ-

ვალდებულა ობიექტებს და გარკვეულ რჩევებსა და შენიშვნებს აძლევდა მრავალრიცხოვანი კოლექტივის მშრომელებს, რაც მის უბრალოებასა და თავმდაბლობაზე მეტყველებს.

რაც ჩვენ, რიგით თანარაიონელებს საკუთარი თვალთა არ გვინახავს, იმაზე ვერაფერს დავწერ, მაგრამ რისი მომსწრენიც გავხდით, მათ შესახებ დადუმება ნამდვილი დანაშაულია. დიდებული ქართველი მეცენატის ფინანსური მხარდაჭერით საჩხერეს მრავალი განახლებული თუ ახლადგებული შენობა-ნაგებობა ამშვენებს.

ბიძინა ივანიშვილის ქველმოქმედება საზოგადოებრივი ყოფის ყველა სფეროს მისწვდა: განათლება იქნება ეს, სამედიცინო მომსახურება, ხელოვნება თუ სპორტი და ტურიზმი. ცალკე უნდა აღინიშნოს მისი წვლილი ქართული ეკლესიის ისტორიაში, რაც უწინარესად სამების გრანდიოზული საკათედრო ტაძრის და კიდევ მრავალი ახალი ეკლესიის აგებითა თუ ძეგლების რესტავრაცია-განახლებით გამოიხატა. მისი მადლიანი ხელი ატყვია ჩვენს ქვეყანაში საყოფაცხოვრებო კულტურის განვითარებასაც, როგორცაა, მაგალითად, გზებისა და კურორტების კეთილმოწყობა. ცალკე საუბრის თემაა მეცენატის დამოკიდებულება ქართული სამეცნიერო და შემოქმედებითი ინტელიგენციის წარმომადგენლებისადმი, რომელნიც „დამოუკიდებელმა“ ქართულმა სახელმწიფომ უმოქმედობისა და შიმშილით სიკვდილისათვის გაწირა. სამწუხაროდ, მათ უმეტესობას არ აღმოაჩნდა გაბედულება იმ უსამართლობისათვის წინააღმდეგობის გასაწევად, რომელსაც დღევანდელი ხელისუფლება ბ-ნი ბიძინას მიმართ იჩენს.

ამიტომ ერთდროულად სასაცილოცაა და სატირალიც, რომ დღეს ბიძინა ივანიშვილს მშობელი ქვეყნის მოქალაქეობის მისაღებად სასამართლოს გადაწყვეტილება სჭირდება.

არა მხოლოდ ჭორვილაში, არამედ მთელ რაიონში მადლიერი მოსახლეობა უფლის მოხსენიებისა და ეკლესიის სადღევრძელოს შემდეგ ბიძინა ივანიშვილის სადღევრძელოს სვამს. მინდა ეს წერილი დავამთავრო გულწრფელი სურვილით: დაე, ბიძინა ივანიშვილს პოლიტიკურ სარბიელზეც ისე ემოღვაწეოს, რომ მისი და მისი ოჯახის დღევრძელობა მთელი ქართველი ხალხის სავედრებლად იქცეს უფლის წინაშე.